

թախծութեան հետ: Ոչինչ մխիթարական չկար, ոչինչ չէր զօրացնում բեկո-
ած սրտերը: Ամեն ոք մի խուլ անբացատրելի տագնապի մէջ էր գտնուում:
Կարծես օդի մէջ շարժուում էր մի դիւակաւ շունչ, որ բոլորի վրայ սարսափ էր
ազդում:

Մի բան սպասուում էր:

Գիշերները մարդիկ տանից դուրս չէին գալիս: Յերեկը շինականները
խումբերով էին գնում իրանց դաշտային մշակութիւնները անելու: Անասուն-
ները գիւղերից շատ հեռու չէին քշում արածացնելու համար: Աղքատը դժ-
գոհ էր, որ ոչինչ չունի, հարուստը դժգոհ էր, թէ ինչպէ՞ս պահէ ունեցածը:
Ճանապարհները դատարկուել էին, քարաւանների երթելակութիւն չկար:
Լեռների մէջ ամեն քար, ամեն ժայռ աւազակ էր դարձել: Անցնելու հնար
չկար:

Ինքը բնութիւնը զայրացել էր. պատժում էր մարդիկներին: Երեք տա-
րի շարունակ երաշտութիւնից յետոյ սկստեցաւ կատաղի սովը: Քուրդերը
իրանց երեխաներին ածել էին բազարներում եւ անցնողներին ասում էին.
«տարեք, պահեցէ՛ք, ձեզ ծառայ եւ ստրուկ դարձրեք, միայն հաց ուտացրեք,
որ չմեռնեն: Շունը, կատուն արժեք ուներ, բայց մարդկանց որդիները ար-
ժեք չունեին: Փողոցները ծածկոած էին նոսրած, գունատոած սովալլուկնե-
րով:

Ամեն կողմից վատ լուրեր էին լսուում:

Մուշ քաղաքի մէջ սովատանջները յարձակուել էին արքունի հացի ամ-
բարների վրայ եւ բոլորը յափշտակել էին: Վանի մէջ հրդեհել էին հազարից
աւելի խանութներ եւ վաճառքները կողոպտել էին: Այն գիշերը հեռու տեղե-
րից եկած գիւղացիներ քաղաքի պարիսպների մօտ բեռնաւորում էին
իրանց գրաստները յափշտակած կողոպուտով: Արտոս լեռան ստորոտնե-
րում, իւր չադրի մէջ, մի անյայտ չարագործ սպանել էր Նեհրիի նշանաւոր
շէյխին: Մի քանի գողեր մտել էին Վանի Յայոց առաջնորդի քնարանը, դա-
նակի ծայրը նրա կուրծքի վրայ դնելով, սրբազանին բաց անել էին տոել ոս-
կիների սնդուկը: Վանի ծովակի վրայ երեւացել էին ջրային աւազակների
նաւակներ: Շատախի գայմադամի կնոջը, երկու երեխաների հետ մի ուխ-
տատեղից վերադառնալու միջոցին, բռնել, տարել լեռների մէջ պահել էին,
հազար ոսկի փրկանք էին պահանջում բաց թողնելու համար: Կառավարու-
թիւնը տագնապի մէջ էր. նա, ինչպէս այլ խօսքով ասում են, գլուխը կորցրել
էր, չգիտեր ինչպէ՞ս առնել չարիքի առաջը: Մինչեւ մի տեղ յայտնուած ան-
կարգութիւնը խաղաղեցնում էր, նրա փոխարէն, ուրիշ տեղերում, յայտնուում
էին աւելի վատթար անկարգութիւններ: Բաղէշում մի կին օր-ցերեկով մտել